

Վաշինգտոնյան գազաթնաժողով. ինչ հետևանքներ կունենա Հայաստանի և տարածաշրջանի համար

ԱՊՐԻ Արմենիայի վերլուծություն

2025թ-ի օգոստոսի 14-ի դրությամբ

ԱՊՐԻ Արմենիայի այս վերլուծությունն արտացոլում է գազաթնաժողովում արձանագրված առաջընթացի հետևանքները Հայաստանի, Ադրբեջանի, վերջիններիս միջև երկարատև խաղաղության գործընթացի, ինչպես նաև տարածաշրջանում հարևանների հետ հարաբերությունների վրա: Չնայած Հարավային Կովկասում առավել կայուն իրավիճակի ապահովման ուղղությամբ ձեռք բերված որոշակի առաջընթացին՝ մասնավորապես, տարաձայնությունների պատճառ հանդիսացող տարանցիկ ուղիների հարցում, ԱՄՆ-ի՝ խաղաղության գործընթացում վերականգնված ներգրավվածության հաջողությունը կայանանավորվի նրանով, թե ինչպես կմեկնաբանվեն և կիրականացվեն պայմանավորվածությունների մանրամասները, ինչպես կարձագանքեն տարածաշրջանային տեքությունները:

2025 թվականի օգոստոսի 8-ին Հայաստանը, Ադրբեջանը և Միացյալ Նահանգները Վաշինգտոնում կայացած գազաթնաժողովի ընթացքում (այսուհետ՝ «վաշինգտոնյան գազաթնաժողով») [ստորագրեցին](#) համատեղ հռչակագիր (այսուհետ՝ «համատեղ հռչակագիր») կամ «հռչակագիր»): Հռչակագիրը նախատեսում է ստեղծել «Ադրբեջանի հիմնական մասի և (...) Նախիջևանի միջև (...) Հայաստանի տարածքով անխոչընդոտ հաղորդակցություն, Հայաստանի համար միջազգային ու ներպետական հաղորդակցության փոխադարձ առավելություններով» Ադրբեջանի տարածքով: Այն նաև ամրագրում է, որ Հայաստանը «աշխատելու է Ամերիկայի Միացյալ Նահանգների և փոխադարձաբար համաձայնեցված երրորդ կողմերի հետ՝ Հայաստանի Հանրապետության տարածքում «Թրամփի ուղի՝ հանուն միջազգային խաղաղության և բարգավաճման» («Trump Route for International Peace and Prosperity») (TRIPP) հաղորդակցության ծրագրի իրականացման շրջանակը սահմանելու նպատակով»:

ԱՄՆ-ի գլխավորությամբ ստորագրված համաձայնագիրը Հայաստանի և Ադրբեջանի միջև երկարատև վեճի լուծում է առաջարկում, թե ինչպես և ինչ հանգամանքներում նրանք կսկսեն տարանցիկ հաղորդակցություն իրականացնել երկու պետությունների միջև: [2020 թվականի նոյեմբերին՝ 44-օրյա պատերազմից հետո](#), Հայաստանի, Ադրբեջանի և Ռուսաստանի կողմից ստորագրված հրադադարի մասին հայտարարությամբ նախատեսվում էր, որ երկու երկրների միջև տարանցիկ կապերը կվերականգնվեն, իսկ տրանսպորտային կապերի վերահսկման համար պատասխանատու կլինեն Ռուսաստանի ԱԴԾ սահմանապահ ծառայության մարմինները: Հայաստանն ու Ադրբեջանը, սակայն, տարաձայնություններ ունեին երթուղիների կառավարման և վերահսկողության հարցում: Վաշինգտոնում առաջարկված լուծումը կարող է ամերիկյան կառույցներին հնարավորություն ընձեռել Հայաստանի հարավով անցնող տարանցիկ երթուղիների կառուցման և կառավարման համար՝ համագործակցելով Հայաստանի իշխանությունների հետ: [Հաստատված պայմանագրերի](#) անձնագրային վերահսկողությունն ու մաքսային ստուգումներն իրականացվելու են Հայաստանի պետական հաստատությունների կողմից՝ ԱՄՆ-ի աջակցությամբ զարգացնելով Հայաստանի սահմանային և մաքսային ծառայությունների հնարավորությունները: Վարչապետ Փաշինյանի մամուլի ասուլիսի համաձայն՝ անվտանգությունը կապահովվի Հայաստանը, մինչդեռ ամերիկյան ներդրումային ընկերությունները կարող են ունենալ իրենց սեփական

անվտանգությունն ապահովող մարմիններ՝ ի լրումն Հայաստանի ոստիկանության, Ազգային անվտանգության ծառայության և իրավական համակարգի:

Համատեղ հոչակագրին զուգահեռ՝ Հայաստանի և Ադրբեջանի առաջնորդները նախաստորագրել են երկու երկրների միջև խաղաղության հաստատման և հարաբերությունների կարգավորման մասին [համաձայնագրի տեքստը](#): Նախաստորագրումը նշանակում է խաղաղության համաձայնագրին ապագայում վերջնականացնելու պարտավորություն, չնայած ժամկետները դեռ չեն հայտարարվել: Հայաստանն ու Ադրբեջանը ԱՄՆ-ի հետ նաև երկկողմ փոխըմբռնման հուշագրեր են ստորագրել: Հայաստանի համար այդ [հուշագրերը](#) կհանգեցնեն ԱՄՆ-ի ներգրավվածության ընդլայնմանը էներգետիկ անվտանգության, ՀՀ կառավարության «խաղաղության խաչմերուկ» նախագծի շրջանակներում ենթակառուցվածքների զարգացման, ինչպես նաև արհեստական բանականության և կիսահաղորդիչների հետ կապված տեխնոլոգիաների ոլորտներում: Ադրբեջանի համար ԱՄՆ-ի հետ կապերը կընդլայնվեն [ռազմավարական գործընկերության](#) հաստատմամբ, որը կներառի պաշտպանության, թվային տեխնոլոգիաների և էներգետիկայի ոլորտներում ավելի սերտ համագործակցություն:

Որո՞նք են Հայաստանի համար հետևանքները

Համատեղ հոչակագիրն զգալիորեն նվազեցնում է Հայաստանի և Ադրբեջանի միջև ռազմական էսկալացիայի հավանականությունը մոտակա ժամանակաշրջանում՝ հնարավորություն տալով Երևանին շարունակել իր ջանքերը տնտեսական զարգացման և պաշտպանական կարողությունների ամրապնդման ուղղությամբ:

ԱՄՆ-ի հետ էներգետիկ անվտանգության, ենթակառուցվածքների, արհեստական բանականության և կիսահաղորդիչների ոլորտներում առավել ընդլայնված գործընկերությունն, ի լրումն [ռազմավարական գործընկերության կանոնադրությամբ](#) արդեն իսկ նախատեսվածից, հավանաբար կխթանի Հայաստանի տնտեսության վերոնշյալ ոլորտները: Հայաստանի կառավարությունը կարող է հրապարակայնորեն ներկայացնել այն առավելությունները, որոնք տվյալ համաձայնագրերը կարող են ընձեռել հայկական բիզնեսին, ինչպես դա արվեց [«Firebird AI» նախագծի մասին հայտարարելու ժամանակ](#): Հարկ է նշել, որ Հայաստանի թիվ մեկ առևտրային գործընկեր Ռուսաստանի, ինչպես նաև Իրանի հետ տնտեսական հարաբերությունները կարող են փոփոխվել ԱՄՆ-ի հետ ավելի սերտ համագործակցության անցնելու արդյունքում: Ադրբեջանի հետ առևտրի և տարանցման ապաշրջափակումը, մասնավորապես, եթե այն ապաշրջափակի առևտուրն ու ապաստանեցնի դիվանագիտական հարաբերությունները Թուրքիայի հետ, նոր մարտահրավերներ և հնարավորություններ կստեղծի Հայաստանի տնտեսության համար: Ի թիվս այլ գործոնների՝ դա կարող է նվազեցնել բացառիկ կախվածությունը, մասնավորապես՝ Ռուսաստանից:

Համատեղ հոչակագրի իրականացման մանրամասների և դրա նկատմամբ պատասխանատվության վերաբերյալ ընդհանուր ընկալման բացակայության պայմաններում կան որոշ խոցելի կետեր, ինչպիսիք են՝ TRIPP-ի կառուցման ընթացքում իրավական տարբեր մեկնաբանությունների և տեղում առաջացող հակասությունների հավանականությունը: TRIPP-ի հայեցակարգի համար անհրաժեշտ են իրականացման շրջանակներ, որոնք կներառեն համակարգման մեխանիզմներ, ֆինանսավորման ծրագրերի հստակություն, ինչպես նաև հակամարտությունների կարգավորման և միջնորդության պոտենցիալ մեխանիզմներ: Կարևոր է նշել, որ Հայաստանը մշտապես, [այդ թվում նաև վերջին շրջանում](#), ընդգծել է, որ Հայաստանի տարածքով անցնող ոչ մի տարանցիկ երթուղի չպետք է ազդի Իրանի հետ նրա սահմանի և հաղորդակցության վրա: Եթե այն բացասաբար է անդրադառնում նրանց ընդհանուր սահմանի պատշաճ գործունեության վրա, դա կարող է վտանգել նոր TRIPP-ը:

Որպեսզի ընդհանուր առաջարկն ավելի մեծ աջակցություն ստանա, անհրաժեշտ է հստակեցում մտցնել Ադրբեջանի տարածքով անցնող փոխադարձ առևտրային երթուղու վերաբերյալ: Թեև համատեղ հոչակագրում նշվում է «փոխադարձ առավելությունների» մասին, ինչը ենթադրում է, որ Հայաստանի քաղաքացիները և հայկական ծագում ունեցող ապրանքները կշահեն Ադրբեջանի տարածքով տարանցումից, ձևակերպումները, թե ինչպես դա կիրառործվի, մնում են անորոշ: Եթե դա տեղի ունենա Ադրբեջանի տարածքով, մուտքն ու ելքը կկարգավորվեն Ադրբեջանի իշխանությունների կողմից՝ առանց երրորդ կողմերի ներգրավման, որը կապահովեր հայ ուղևորների անվտանգությունն ու կտրամադրեր պաշտպանության լրացուցիչ երաշխիք: Նման իրավիճակը կարող է ընկալվել որպես անհավասարակշիռ լուծում և մեծ զիջում հայկական կողմից:

Վաշինգտոնում ստորագրված փաստաթղթերում որևէ հիշատակում չի արվել Բաքվում պահվող հայ ռազմագերիների ազատ արձակման, ինչպես նաև Լեռնային Ղարաբաղից տեղահանված էթնիկ հայերի վերադարձի իրավունքի և նրանց պաշտպանության այլ երաշխիքների վերաբերյալ: Վերջինիս առնչվող որոշակի հիշատակում կարելի էր ակնկալել, հաշվի առնելով, որ Նախագահ Թրամփը [2024 թվականի նախընտրական քարոզարշավի ժամանակ հայտարարել էր](#), որ կաջակցի Լեռնային Ղարաբաղի հայերի նկատմամբ հետապնդումների դադարեցմանը: Եվրոպայի անվտանգության և համագործակցության կազմակերպության (ԵԱՀԿ) Մինսկի խումբը (բանակցային հարթակ, որը ստեղծվել է 1992 թվականին՝ Լեռնային Ղարաբաղի հակամարտության խաղաղ լուծում գտնելու համար) լուծարելու Հայաստանի և Ադրբեջանի համատեղ կոչը կսահմանափակի այդ բնակչության իրավունքները կամ 2023 թվականին [Ադրբեջանի կողմից նրանց բռնի տեղահանման](#) հանգամանքներին վերաբերող հարցերը բարձրաձայնելու հնարավորությունները: Ավելին, քանի որ խաղաղության պայմանագիրը ներառում է հողված՝ միջազգային դատարաններից իրավական գործերի հետևանքման վերաբերյալ, հայերը սահմանափակ հնարավորություններ կունենան մարդու իրավունքների խախտումների փոխհատուցմանը հասնելու համար: Սա դժգոհություն կառաջացնի հայկական հանրության որոշ շերտերում՝ թե՛ հայրենիքում, թե՛ Սփյուռքում:

Հայ-ադրբեջանական հարաբերությունների բարելավումը և այն, թե ինչպես դա կանդրադառնա Հայաստանի քաղաքացիների վրա, լինելու է 2026թ. հունիսի 7-ի ընտրությունների հիմնական առանցքներից մեկը: [Հայաստանում հասարակական կարծիքը](#) միտված է խաղաղության հաստատմանը Ադրբեջանի հետ և այն դիտարկում է որպես կառավարության առաջնային նպատակ: Այս առումով Վաշինգտոնում ստորագրման արարողությունը կարող է դիտարկվել որպես նշանակալի ձեռքբերում, որը, հավանաբար, կուժեղացնի կառավարության ժողովրդականությունն ընտրությունների նախաշեմին: Սպասվում է նաև [Հայաստանի նոր սահմանադրության վերաբերյալ հանրաքվե](#) այն համատեքստում, երբ Սահմանադրության փոփոխությունները [շարունակում են նախապայման լինել](#) Ադրբեջանի կողմից՝ խաղաղության համաձայնագիրը վերջնականապես ավարտին հասցնելու համար: Զուգահեռաբար, հաշվի առնելով Հայաստանում առկա խիստ բևեռացված քաղաքական միջավայրը, ԱՄՆ-ի միջնորդությամբ ստորագրված համաձայնագրի վերաբերյալ ցանկացած դժգոհություն կամ անհամաձայնություն, կամ ավանդական գործընկերների հետ հնարավոր լարվածություն, հավանաբար, կուռճացվի կառավարության քաղաքական հակառակորդների կողմից:

Համատեղ հոչակագրից դուրս մնացած մեկ այլ գլխավոր հարց վերաբերում է ադրբեջանական զինված ուժերի կողմից հայկական տարածքների ներկայիս օկուպացիային: 2021 թվականի մայիսի, 2021 թվականի նոյեմբերի և 2022 թվականի սեպտեմբերի հարձակումների ժամանակ Ադրբեջանի զինված ուժերը գրավեցին ռազմավարական նշանակության մոտ [200 քառակուսի կիլոմետր](#) հայկական տարածք: Հայաստանն ու Ադրբեջանը բազմիցս հայտարարել են, այդ թվում՝ 2022 թվականին [Պրահայում](#) և վերջերս Վաշինգտոնում, որ հավատարիմ են 1991 թվականի Ալմա-Աթայի Հռչակագրին,

որը ճանաչում է իրենց պետությունների տարածքային ամբողջականությունը՝ համաձայն Խորհրդային Միության գոյության ընթացքում իրենց վարչական սահմանների: Այնուամենայնիվ, Հայաստանից ադրբեջանական զորքերի դուրսբերման հարցը չի քննարկվել: Սահմանների պաշտոնական սահմանագծման և սահմանազատման գործընթացը, որը խաղաղության գործընթացի կարևոր բաղադրիչներից է, կարող է տարիներ կամ նույնիսկ տասնամյակներ տևել, և այդ ճանապարհին կարող են նոր տարաձայնություններ ի հայտ գալ:

Որո՞նք են Ադրբեջանի համար հետևանքները

Այն ժամանակ, երբ գործնականում կներդրվի TRIPP-ի ենթակառուցվածքը, Ադրբեջանի համար ամենամեծ ձեռքբերումը կլինի ցամաքային ուղիղ կապի ապահովումն իր նախիջևանյան էքսկլավի հետ, այնուհետև՝ դեպի դաշնակից Թուրքիա: Մինևույն ժամանակ, գործարքն Ադրբեջանի համար ավելի լայն աշխարհաքաղաքական վերադասավորման հնարավորությունների ազդակ է: Վաշինգտոնի գազաթնաժողովի արդյունքում Ադրբեջանը [սկսեց ԱՄՆ-ի հետ ռազմավարական գործընկերություն հաստատելու գործընթացը](#): Սա կարող է բացասաբար անդրադառնալ Ռուսաստանի (սկսել են վատթարանալ 2024 թվականի դեկտեմբերից) և հնարավոր է նաև Թուրքիայի հետ վերջինիս հարաբերությունների վրա՝ մինևույն ժամանակ խորացնելով տնտեսական համագործակցությունը ԱՄՆ-ի հետ էներգետիկայի և այլ ոլորտներում: Ադրբեջանը նաև հնարավորություն ունի ավելի սերտորեն համագործակցելու ԱՄՆ-ի հետ պաշտպանության հարցում այն բանից հետո, երբ Թրամփը հայտարարեց Ադրբեջանի և ԱՄՆ-ի միջև պաշտպանական համագործակցության բոլոր սահմանափակումների վերացման մասին: Սրան հաջորդեց Թրամփի կողմից ԱՄՆ-ի «Ազատության աջակցության մասին» օրենքի 907-րդ հոդվածի չեղարկումը, որն արգելում էր ԱՄՆ-ի օգնությունը՝ գործնականում ռազմական աջակցությունն, Ադրբեջանի կառավարությանը (հոդված, որն ընդունվել էր 1992 թվականին հայկական ակտիվ լոբբինգի հետևանքով և ժամանակավորապես չեղարկվել էր հետագա բոլոր վարչակազմերի կողմից՝ սկսած Ջորջ Բուշ կրտսերից մինչև 2023թ.):

Բաքվին զիջում կատարելով (վերջին երկու տարվա ընթացքում [Երևանի դիրքորոշումն](#) այն էր, որ խաղաղության համաձայնագրի ստորագրման հետ մինևույն օրը կստորագրվի ԵԱՀԿ Մինսկի խմբի լուծարման մասին փաստաթուղթ)՝ Հայաստանն ու Ադրբեջանը համատեղ դիմում են հղել ԵԱՀԿ-ին՝ ԵԱՀԿ Մինսկի խումբը փաստացի լուծարելու վերաբերյալ: Քանի որ խաղաղության համաձայնագիրը մոտենում է վերջնական ստորագրմանը, Բաքվի կառավարությունը ստիպված կլինի զգալի քայլեր ձեռնարկել իր բնակչությանը Հայաստանի հետ կանոնակարգված հարաբերություններին նախապատրաստելու համար: Այս քայլը կպահանջի ադրբեջանական հասարակության վերակողմնորոշում և նրա ղեկավարության կողմից տարածվող խոսույթի (Հայաստանը երկար ժամանակ [ներկայացվում](#) էր որպես հավաքական թշնամի, ինչպես նաև [փառաբանվում էր հարևանի դեմ ուժի կիրառումը](#)) փոփոխություն: Սա կլինի դրամատիկ շրջադարձ, որը կգրկի Ալիևի կառավարությանը իր ամենահաճախակի շրջանառվող թեմաներից մեկից, որը ծառայել է որպես ներքին դժգոհությունից շեղող միջոց:

Ինչպիսի՞ն կլինի Ռուսաստանի պատասխան քայլը

Համատեղ հոչակագիրը կամրապնդի Միացյալ Նահանգների ազդեցությունն ու ներգրավվածությունը Հարավային Կովկասում՝ մի տարածաշրջանում, որը Ռուսաստանը [դիտարկում](#) է որպես իր ազդեցության գոտի:

Ռուսաստանի, Հայաստանի և Ադրբեջանի միջև 2020 թվականի նոյեմբերին կնքված եռակողմ [հայտարարության](#) համաձայն՝ Ռուսաստանի իշխանությունները պետք է ստանձնեին հարավային

Հայաստանի միջով անցնող հնարավոր ճանապարհը կառավարելու և պարեկային ծառայություն իրականացնելու դերը: Այժմ, TRIPP-ի մոդելի համաձայն, հիմնական գործառնական դերը կանցնի ԱՄՆ-ի և Հայաստանի կառույցներին, իսկ դրա հետ կապված հեղինակությունը՝ Վաշինգտոնին: Սա թե՛ ռազմավարական, թե՛ մարտավարական հարված է Ռուսաստանին, քանի որ ԱՄՆ-ի համար այն նոր ներկայություն է ստեղծում այն տարածքում, որտեղ Մոսկվան նախկինում գերիշխում էր առանց լուրջ մրցակցության:

Ռուսաստանի սկզբնական [արձագանքը](#) զգուշավոր էր՝ Ռուսաստանը ողջունեց հռչակագիրը: Սակայն այն նաև առաջ քաշեց երկու հարց, որոնք Մոսկվան կարող է ներառել Հայաստան-Ռուսաստան օրակարգում և որոնք կարող են ազդել ԱՄՆ-ի հետ գործարքի իրականացման վրա՝ Հայաստանի անդամակցությունը Եվրասիական տնտեսական միությանը (ԵԱՏՄ)՝ որպես տարանցման և փոխադրման հիմնական գործոն, ինչպես նաև ռուս սահմանապահների ներկայությունը հայ-իրանական սահմանին: Միջնաժամկետ հեռանկարում Մոսկվան, ամենայն հավանականությամբ, կփորձի ազդել փոփոխությունների գործընթացի վրա՝ իր շահերը պաշտպանելու նպատակով, մասնավորապես՝ տրանսպորտային կապերի հարցում: Միննույն ժամանակ, չնայած Հայաստանի և Ադրբեջանի վրա ազդող զգալի տնտեսական և էներգետիկ լծակներին, Մոսկվան պետք է հաշվի առնի երկու հարևանների՝ Ռուսաստանից հեռանալու ռիսկը: ԱՄՆ կառույցների ներգրավվածությունը Եվրասիական Տնտեսական Միության անդամ պետության միջոցով մաքսային վերահսկողության և տարանցման գործընթացում կարող է լուրջ մտահոգություն առաջացնել Ռուսաստանի համար: Ռուսաստանը միության առևտրի և տարանցման կանոնների միջոցով Հայաստանի վրա ճնշում գործադրելու լծակներ ունի՝ Վաշինգտոնի հետ գործարքների ընթացքը դանդաղեցնելու համար: Հատկանշական է, որ Ռուսաստանը կարող է առաջ քաշել [ԵԱՏՄ պայմանագրի 29.1 հոդվածը](#), պնդելու, որ անդամ պետության ներկայացուցիչներ չհանդիսացող կազմակերպությունների ներգրավվածությունը խախտում է պայմանագիրը:

Ռուսաստանը կարող է նաև ճնշում գործադրել Ադրբեջանի վրա՝ [հաշվի առնելով նրանց փոխկապակցված տնտեսական շահերը](#) հաղորդակցության նախագծերում՝ TRIPP-ի գործընթացում իր որոշակի ներգրավվածությունը պահանջելու նպատակով: Հետաքրքիր է, որ ռուս մեկնաբանները [պարբերաբար քննադտում են](#), որ Վաշինգտոնի հետ կնքված համաձայնագիրը նաև սպառնալիք է Իրանի համար՝ փորձելով ևս մեկ անգամ Թեհրանին մոտեցնել Մոսկվայի դիրքորոշմանը: TRIPP-ի երկաթուղային հատվածը կանցնի հայ-իրանական սահմանի անմիջական հարևանությամբ, որտեղ տեղակայված են ռուսական սահմանապահ զորքերը: Ռուսաստանը կարող է ակնկալել, որ, ի վերջո Հայաստանը կխնդրի ռուսական սահմանապահ զորքերի դուրսբերումը հայ-իրանական սահմանից, ինչը ևս մեկ քայլ կլինի Հայաստանում ռուսական ռազմական ներկայությունը նվազեցնելու ուղղությամբ: Մյուս կողմից, եթե «Խաղաղության խաչմերուկն» իրականացվի այնպես, ինչպես այն ներկայումս նախագծված է, Մոսկվան [կշահի](#) Հայաստանից Ռուսաստան երկաթուղային հասանելիությունից Ադրբեջանի միջոցով:

Բացի վերը նշված կետերից, Մոսկվան կարող է ձգտել մասնակցել նախագծի իրականացմանը, օրինակ՝ TRIPP-ը «Հարավկովկասյան երկաթուղի» ՓԲԸ-ին ինտեգրելու միջոցով: Սա կօգնի Մոսկվային հավասարակշռել փոփոխությունները և ապահովել իր շարունակական ներկայությունը տարածաշրջանում: Քանի դեռ Ռուսաստանը շարունակում է կենտրոնանալ Ուկրաինայում ընթացող պատերազմի և Արևմուտքի հետ հակասությունների վրա, Մոսկվան չունի բավարար ներուժ և կարողություններ՝ անմիջական քայլեր ձեռնարկելու ԱՄՆ-ի ղեկավարությամբ ձեռք բերված համաձայնությանը հակազդելու համար: Ավելին, հաշվի առնելով ԱՄՆ-ի հետ համաձայնության հասնելու կարևորությունը Ռուսաստանի համար, Ռուսաստանի նախագահ Վլադիմիր Պուտինը պատրաստ չէ ուղղակիորեն խաթարել ԱՄՆ նախագահ Դոնալդ Թրամփի հեղինակությունը:

Իրավիճակը կարող է փոխվել, եթե Ռուսաստանն ու ԱՄՆ-ը մինչև 2025 թվականի վերջը կարողանան դադարեցնել պատերազմն Ուկրաինայում: Վերջապես, հաշվի առնելով զարգացումները և դրանց աշխարհագրական մերձավորությունը, Ռուսաստանը պետք է ձգտեն վերանայել իրենց հարաբերությունները՝ տարածաշրջանում երկարատև խաղաղության հասնելու նպատակով:

Որո՞նք են Իրանի համար հետևանքները

Թեհրանի արձագանքը երկիմաստ էր, որտեղ երկու հիմնական շեշտադրում արվեց. Հայաստանի և Իրանի միջև հաղորդակցությունների պահպանման հրամայականը, որն ազդել էր «Զանգեզուրի միջանցքի» դեմ Իրանի դիրքորոշման վրա, և ԱՄՆ-ի ներկայությունը նրա սահմանների մոտ:

Հայաստանի միջոցով Ադրբեջանից Նախիջևան և Թուրքիա «անարգել մուտքը», որն ամրագրված է համատեղ հռչակագրում, կարող է մտահոգության պատճառ դառնալ Իրանի համար, եթե վերջինս համարի, որ TRIPP-ը փակում է իրանա-հայաստանյան սահմանը և վտանգում է Հայաստանի ինքնիշխանությունը:

Իրանի գերագույն առաջնորդի ավագ խորհրդական Ալի Աքբար Վելայաթին «Թասնիմ» լրատվական գործակալությանը [հայտնել է](#), որ «Թեհրանը կփակի ԱՄՆ-ի կողմից աջակցվող կովկասյան միջանցքը՝ Ռուսաստանի հետ կամ առանց նրա՝ պնդելով, որ այդ անցումը գերեզմանոց կդառնա Թրանսիի վարձկանների համար»: Ավելի մեղմ ձևակերպմամբ [Իրանի արտգործնախարարն քննադատել է](#), որ Թեհրանը գոհ է այն հանգամանքից, որ տարանցիկ ուղին կկառուցվի Հայաստանի ինքնիշխանության և իրավասության ներքո, թեև ամերիկյան ընկերության հնարավոր մասնակցությունը շարունակում է մտահոգություն առաջացնել: Իրանի նախագահը ՀՀ վարչապետ Փաշինյանի հետ իր հեռախոսազրույցի ընթացքում [քննադատել է](#), որ TRIPP-ի նախաձեռնության իրականացմանը ռազմական կամ անվտանգության ուժերի միջամտությունը պետք է բացառվի: [Նախագահ Փեգեշիանի սպասվող այցը](#) Հայաստան լույս կսփռի հայ-իրանական հարաբերությունների ամրության և Իսլամական Հանրապետության դիրքորոշման այս նոր կոնֆիգուրացիայի վրա:

Քանի որ Իրանը ձգտում է վերականգնել իր կարողությունները 12-օրյա իրանա-իսրայելական պատերազմից հետո, Թեհրանը, հավանաբար, անհապաղ գործողություններ չի ձեռնարկի: ԱՄՆ-ի ներկայությունը հայ-իրանական սահմանի երկայնքով, որը գործնականում անխուսափելի կլինի TRIPP-ի ծրագրի իրականացման դեպքում, կարող է դիտվել որպես Իրանի համար անվտանգության սպառնալիք, հատկապես Իսրայելի և Իրանի միջև հնարավոր նոր ռազմական էսկալացիայի լույսի ներքո՝ ԱՄՆ-ի հնարավոր ներգրավվածությամբ:

Եթե Թեհրանը ցանկանա խանգարել TRIPP-ի ծրագրի իրականացմանը, Իսլամական Հանրապետությունը կարող է խոչընդոտել Հնդկաստանից և միջազգային այլ գործընկերներից կարևորագույն պաշտպանական սարքավորումների հոսքին կամ բարդացնել ներմուծման/արտահանման գործողությունները (Հայաստանի առևտրային տարանցիկ փոխադրումների մոտ [30%](#)-ն իրականացվում է դեպի Իրան կամ դրա միջով):

Այս ամենով հանդերձ, Իրանը պետք է ապահովի, որ իր հարևանների հարաբերությունները հակառակորդ երկրների հետ ուղղված չլինեն Իրանի շահերի դեմ: Այս նպատակի հստակ դրսևորումը հայ-իրանական երկկողմ հարաբերությունների ակտիվ զարգացումն է: [Իրանցի պաշտոնյաների խոսքով](#), Երևանն ու Թեհրանն աշխատում են ռազմավարական գործընկերության համաձայնագրի վրա, որը կխթանի երկու հարևանների միջև համագործակցությունը:

Ո՞րն է Թուրքիայի տեսակետը և ինչպե՞ս դա կարող է ազդել Հայաստանի հետ հարաբերությունների կարգավորման վրա

Թուրքիայի արտաքին գործերի նախարարությունը [նղջունեց](#) Վաշինգտոնում ձեռք բերված առաջընթացը կայուն խաղաղության ուղղությամբ: Հայտարարությունում ասվում էր, որ «պատմական հնարավորություն է ստեղծվել Հարավային Կովկասի համար՝ հասնելու խաղաղության և բարեկեցության, և որ Թուրքիան շարունակելու է աջակցել եղբայրական Ադրբեջանի նվիրական ջանքերին»՝ ընդգծելով իր կողմնակալությունը Բաքվի և վերջինիս շահերի նկատմամբ: 2025 թվականի օգոստոսի 9-ին Ադրբեջանի և Թուրքիայի առաջնորդների միջև հեռախոսազրույցի ընթացքում նախագահ Ալիևը [բարձր գնահատեց](#) նախագահ Էրդոհանի և Թուրքիայի դերը Հայաստանի և Ադրբեջանի միջև հարաբերությունների կարգավորման գործընթացում, թեև նրանց անմիջական ներգրավվածությունը Վաշինգտոնի գազաթնաժողովին դեռևս հստակ չէ:

Ադրբեջանից դեպի Նախիջևան և Թուրքիա Հայաստանի տարածքով «անխոչընդոտ մուտքի» հաստատումը համապատասխանում է Անկարայի շահերին, քանի որ այն կընդլայնի Թուրքիայի ազդեցությունը Հարավային Կովկասում և լրացուցիչ առևտրային ուղիներ կբացի դեպի Կենտրոնական Ասիա: Ռուսաստանի և Իրանի ազդեցության հնարավոր նվազումը տարածաշրջանում ևս շահավետ է Թուրքիայի համար: Այնուամենայնիվ, ԱՄՆ-ի երկարաժամկետ ներկայությունը Հայաստանում կխոչընդոտի Թուրքիայի՝ ԱՄՆ առաջնահերթություններից անկախ տարածաշրջանային գերիշխող պետություն դառնալու ծրագրերին: Այն նաև խաթարում է մրցակցության-համագործակցության ցիկլը, որի միջոցով Թուրքիան և Ռուսաստանը համատեղ կառավարել են տարածաշրջանում առկա խնդիրները:

Վաշինգտոնի գազաթնաժողովի ազդեցությունը Թուրքիա-Հայաստան հարաբերությունների կարգավորման գործընթացի վրա ակնհայտ կդառնա առաջիկա ամիսների ընթացքում: Թուրքիայի վրա ճնշում է գործադրվում՝ իրականացնելու 2022 թվականի հուլիսին Հայաստանի հետ ձեռք բերված [պայմանավորվածությունները](#), որոնք մասամբ կբացեն երկու երկրների միջև սահմանը: Այլընտրանքորեն՝ Թուրքիան կարող է շարունակել օգտագործել կարգավորման գործընթացը որպես միջոց՝ ստիպելու Երևանին համաձայնել լրացուցիչ պահանջներին: Այդպես կարելի է մեկնաբանել [Թուրքիայի հայտարարությունը](#) նախագահ Էրդոհանի և վարչապետ Փաշինյանի միջև օգոստոսի 11-ին կայացած հեռախոսազրույցից հետո: Ի հակադրություն, նույն հեռախոսազրույցի ժամանակ վարչապետ Փաշինյանը [նշել է](#), որ Ադրբեջանի հետ հարաբերությունների բարելավումը նշանակում է, որ Հայաստանի և Թուրքիայի միջև նախկինում ձեռք բերված համաձայնագրերը կյանքի կոչելու հնարավորությունն ավելի մեծ է, քան երբևէ:

Ամեն դեպքում, Թուրքիայի (և Ադրբեջանի) հետ սահմանների բացումը Հայաստանի համար կհանգեցնի առևտրային քաղաքականության խնդիրների՝ հաշվի առնելով երկրների տնտեսական անհավասարությունը և այն հանգամանքը, որ ԵԱՀԿ՝ անդամ լինելով՝ Երևանը չի կարող ինքնուրույն ձևավորել կամ փոփոխել իր առևտրային և մաքսային կարգավորումները: Սահմանների բացումը պետք է նախապես մանրակրկիտ գնահատվի, որպեսզի այն շահավետ լինի և չվնասի տեղական բիզնեսին:

Դեպի ո՞ւր ենք շարժվում

Վաշինգտոնի գազաթնաժողովը կարելի է դիտարկել որպես Հայաստանի և Ադրբեջանի միջև բանակցային գործընթացի կարևորագույն հանգրվան, մասնավորապես այն պատճառով, որ Բաքուն գնաց Վաշինգտոն այն պայմաններում, երբ բազմիցս [շեշտել էր բացառապես երկկողմ բանակցությունների պահանջը](#): Գազաթնաժողովը նվազեցրեց էսկալացիայի հավանականությունը

առնվազն մինչև 2026թ. -ի ընտրությունները, եթե ոչ ավելի երկար ժամանակով և ամրապնդեց ԱՄՆ-ի դերը որպես հիմնական միջնորդ՝ միաժամանակ մի կողմ մղելով Ռուսաստանին և շրջանցելով Եվրոպական Միությանը, որը մինչ այդ ակտիվ ներգրավվածություն ուներ տարածաշրջանում: Համատեղ հոչակագիրը գործնականում փոխարինել է 2020-2022 թվականներին ստորագրված Հայաստան-Ադրբեջան-Ռուսաստան եռակողմ մի շարք հայտարարությունները, երբ խոսքը վերաբերում էր Սյունիքով Ադրբեջանը Նախիջևանին կապող երթուղիների նկատմամբ ռուսական սահմանապահ զորքերի վերահսկողության ապահովմանը: TRIP-ի ծրագրի ֆինանսավորումը և դրան կից «Խաղաղության խաչմերուկի մասին» երկկողմ փոխըմբռնման հուշագիրն առաջմ մնում են անորոշության մեջ: ԵՄ-ն կարող է լինել ֆինանսավորման պոտենցիալ աղբյուր՝ հաշվի առնելով վերջինիս երկարատև աջակցությունն ու ներգրավվածությունը երկրի հարավում գտնվող հայկական ենթակառուցվածքային նախագծերում: Այլ երկրներ, ինչպիսիք են Միացյալ Արաբական Էմիրությունները, նույնպես հետաքրքրված են ռազմավարական ներդրումներով:

Ռուսաստանի և Իրանի երկարաժամկետ տարածաշրջանային հաշվարկների փոփոխությունները Հարավային Կովկասում ԱՄՆ ներկայության աճի պայմաններում կարող են ազդել համատեղ հոչակագրում շարադրված ծրագրերի վրա: Ուկրաինայի վերաբերյալ ԱՄՆ-Ռուսաստան հնարավոր գործարքը նույնպես, հավանաբար, կազդի գործընթացի վրա, քանի որ փոխադարձ զիջումները կարող են ընդգրկել ոչ միայն Ուկրաինան, այլև նախկին խորհրդային տարածքի այլ շրջաններ, այդ թվում՝ Հարավային Կովկասը:

Վաշինգտոնի գազաթնաժողովը մեկ քայլ առաջ է, սակայն այն չի կարող ազդարարել տասնամյակներ տևած այս հակամարտության ավարտը: Ադրբեջանը շարունակում է Հայաստանի նկատմամբ պահպանել հստակ ռազմական և ռեսուրսային առավելություն, որը կարող է գործի դրվել տարաձայնությունների դեպքում: Բաքուն շարունակում է առաջ մղել [մի շարք պահանջներ](#), ներառյալ՝ Հայաստանի Սահմանադրության շուրջ վիճահարույց փոփոխությունները, ինչպես նաև «Արևմտյան Ադրբեջանի» վերաբերյալ ռեզիդենտական հավակնությունները՝ դրանցից պաշտոնապես չիրաժարվելու պայմաններում: Մյուս չլուծված և էական հարցերից են սահմանագծումն ու սահմանագատումը, անկլավների խնդիրը, Բաքվում պահվող գերիների ճակատագիրը, ինչպես նաև Լեռնային Ղարաբաղից տեղահանված հայերի վերադարձի իրավունքն ու նրանց պաշտպանության այլ երաշխիքները:

Վաշինգտոնի գազաթնաժողովի հաջողության ապահովման համար կարևոր է, որ Երևանը ձեռք բերի հստակ օգուտներ և հավասարակշռված պայմանավորվածություններ, ներառյալ՝ գործուն և անվտանգ փոխադարձ ճանապարհային կապ Ադրբեջանի տարածքով: Այս վերլուծության շրջանակում մենք բազմիցս ընդգծել ենք համատեղ հոչակագրի իրականացման պայմանների կարևորությունը՝ հատկապես այն հանգամանքը, թե ինչպես է ձևավորվելու հավանական պետական-մասնավոր գործընկերությունը՝ միաժամանակ ապահովելով Հայաստանի և ԱՄՆ-ի շահերը, ինչը կնպաստի այս ծրագրի ցանկալի հաջողության ապահովմանը: Գործընթացի ցանկալի արդյունք արձանագրելու համար ԱՄՆ-ը պետք է ցուցաբերի շարունակական և ամուր միջնորդական դերակատարում՝ երաշխավորելով գործընթացի անխափան ընթացքը:



ԱՊՐԻ Արմենիայի մասին

ԱՊՐԻ Արմենիան անկախ և անկուսակցական վելուծական կենտրոն է, որի նպատակն է նպաստել տարածաշրջանային կայունությանը, կայուն զարգացմանն ու քաղաքացիական ներգրավվածությանը: Մեր առաքելությունն է փոխել Հայաստանի զարգացման հետագիծը առավել կայուն, ամուր և ժողովրդավար ապագայի ուղղությամբ:

Մեզ կարող եք հետևել [օնլայն](#) և [LinkedIn](#)-ում: